

UN PITTURI PACICOTU

Siddu n'artista si purria chiamari
cui, cù tila, pinseddu e cultura
e cù mastria sapiri mpustari
tanti biddizzi di matrinatura.
St'artista vi lu vogghiu prisintari
(lu capu mastro) di li prufissura
v'invita a tutti quanti visitari
la sua quinta mostra di pittura.

Un Pacicotu ancora picciutteddu
chi appi la furtuna d'incuntrari,
lu canusciti tutti è zuppareddu
Francu Scarutu u vogghiu n'numinari;
camina quasi a stentu puvireddu,
v'à ncerca di lu pani guadagnari
però mittennu nmanu lu pinseddu
un stracciu vecchiu vi lu fà parlari.

L'autru jornu mi vinni a truvare
assittateddu ntra lu mè jardinu,
additta stessu si misi a parlari
facennusi na sponza gelsuminu.
Mi rissi: jò na mostra avissi a fari,
vossia mi lu facissi pi Parrinu?
Mentri chi l'appi jò stu granni onuri,
ci vegnu a fazzu li megghiu Auguri.

C'è cu soffri c'è cu gori,
c'è cu acchiana c'è cu scinni,
l'omu finu quannu mori
un'amicu un si lu vinni.
Tra ricchizzi, tra tisoni
una lagrima ti scinni?
Si l'acchetti stu mè cori,
leggitillu e preatinni.

GROSSU ERRURI

Qualunqui pianta nata a la rinfusa
è certu chi nun mori nsarvaggiuta.
C'è sempri na pirsuna ginirusa
chi la cultiva, la nnesta e la puta;
ma c'è Pueti digni di la Musa
chi senza nudda scola chi l'aiuta,
la sò mirudda ci resta cunfusa
sutta di l'ignuranza sippilluta.

Quindi ci vurria, chi la cuscenza
duvissi menti e cori equilibrati
e nun c'essiri chiù la differenza
di chiddu scarsu un putiri sturiari.
Sultantu d'accussì l'intelligenza,
si pò di l'ignuranza siparari,
e siminannu sta bona simenza
un fruttu bonu si pò ricavari.

Ma nveci siguitannu di stu passu
sfilamu la marredda a lu riversu
si civiltati c'è, ristamu arrassu
li chiù arritrati ntuttu l'Universu.
Cunsidirati chi pi l'omu scarsu
nun c'è nè civiltà, nè c'è prugressu;
si pirmittiti prima chi m'arrassu
l'esempiu l'haviti di me stesso.

Sugnu l'estrattu di murtalità
suggettu a un miserabili pianeta,
granni campiuni di la puvirtà
e lu chiù fissa di tutti i Pueta,
e chiddi chi mi dicinu Papà,
sù ottu, tutta l'opira cumpleta,
ma punn'haviri possibilità,
stannu criscennu tutti analfabeta.

Stu gran pinseri quantu mi turtura
l'arma, lu corpu, lu cori, la menti.
Quantu avvucati, patri cinatura
misati nteri di priari genti.
Viscu arcipreti, matri supiriura
l'haju pijatu cuntinuamenti;
ristannu tra niatri, fin'astura
di risultatu, nun haiu vistu nenti.

Lu settimu figghiu mi crisci sbannutu
stu gran pinseri tantu mi dispera,
si mi cririti mi sentu avvilutu
nun trovu versu, nun trovu manera.
'Nchiusu lu vurria 'nta n'istitutu
sutta la disciplina chiù severa,
(mannò lu nchiuru jò rintra un tabbutu
facennumi trent'anni di galera).

Perciò sugnu riduttu all'imputenza
persi curaggiu, forza e vuluntà,
nò pi dirittu, nè pi priputenza
ma sulamenti pi nicissità.
Vogghiu pi scudu la vostra cuscenza
si c'è veru prugressu e civiltà,
e vi prumettu la mè ricumpenza
ristannu gratu pi l'eternità.

MUTTU ANTICU

Lu vinu e l'ogghiu si spremi cu torchiu,
la sfacinnata stà sempri a lu specchiu,
pi li canfuggia ciuri di laprocchiu
dù ziti pi na zita sù suverchiu,
na donna chi cù tanti strizza l'occhiu
ci servi lu maritu pi cuvecchiu
dissi lu babbaluciu a lu finocchiu
chi sempri ci ni voli di lu vecchiu.

REGOLE

Quannu travagghi fai chiddu chi poi
cuntentati du picca e di l'assai,
s'un metti favi pi scantu di Roi
è la chiù stupidaggini chi fai,
cosi d'autru nun li fari toi,
nun cunfirmari chiddu chi nun sai,
(e chiddu c'un si fà li fatti soi
cu na lanterna v`a circannu vai).

CARNEVALE

La morti di mé nannu, e di mé nanna.

Doppu quarant'anni esattamenti
nautra vota ccà appi a turnari;
mi vinniru a prigari tanta genti
e negativa un ci nnì potti fari,
e ora sugnu ccà puru presenti
pi la fiacchizza di cannalivari;
vistu chi semu ccà tutti a na banna,
vi parlu di mé Nannu e di mé Nanna.

Eranu tutti rui in agunia
e tutti rui carrichi di guai,
mé Nannu a mé Nannuzza ci dicia:
quannu tu mori, jò soffru chiossai.
Mé Nanna dissi, tu penza pi tia
chissu nun è discursu chi tu fai;
lu sai chi cu la morti un si babbia?
cù è chi mori prima, tu lu sai?

Difatti unn'arrivaru mancu all'annu
chi doppu pocu tempu chi passau
lu primu chi muriu fù mé Nannu
e comu vosi Diu si quitau.
Mé Nanna ntra lu stentu e ntra l'affannu
cu l'aiutu di Diu la supirau,
e gnornu gnornu ia migghiurannu,
in parti li sò forzi l'acquistau.

E manu manu ch'ù tempu passava
jornu pi jornu nforzava di chiui,
'nfatti lu sò filaru sù tirava
e certi voti facia pi dui.
Chi v'haiu a diri? jò mi nì priava,
dissi nun mori ristannu ntra nui;
ma cu surprisa na bedda jurnata,
ivi a truarla mezza abbannunata.

Quannu jò la vitti afflitta afflitta,
dissi ntra mia, comu finiu?
Cu na ranfata, cu la manu dditta
nsemi a l'aiutu chi mi resi Diu,
happi la sorti di mettila additta.
M'appena la lassai, pigghia e cariu;
tannu jò rissi un nì parlamu chiui,
sta vota si chiuriu l'allallui.

Ristau no divanu accuffulata,
jò dda vicinu mischinu di mia;
spissu ci rava qualchi trantuliata
ma mischinedda nun mi rispunnia.
Cu la sò peddi tutta arrapacchiata
picciotti cumpassioni mi facia;
e nfini iu a finiri all'urtimata,
ora morsi virè la Nanna mia.

Sta morti di mé Nanna fù un piccatu
sempri vivaci e allegru mi tinia,
ponnu cunsidirari lu mè statu
qualcunu ch' à mé Nanna conuscia.
Quantu rranni duttura haiu ntirpillatu,
ognunu "un c'è spiranza" mi dicia;
e mi rassegnu malu rassegnatu:
s' à quantu ci ni sunnu comu mia.

Però jò nun mi pozzu rassegnari
e chiangu sempri com' un picciriddu
pi lu rimediù putiri truvàri
mi cunfirava cu chistu e cù chiddu.
E ora chiù nun pozzu addulurari
li scarcaniati chi si fà Turiddu;
poi avemu a ririri e scialari
quannu la Nanna mori puru a iddu.

Nun ci sunnu scenziati, nun cè dotti
a unu a unu la morti n' agghiutti
staiu avvisannu a vuiatri picciotti
cusà cè qualchi fissa chi mi sfutti.
Adamu vinni cunnannatu a morti
e sta cunnanna la lassau pi tutti;
però chiù tinta ancora è la cunnanna,
si unu mori prima di la Nanna.

Ora cunchiusu stu raggiunamentu
vi pregu a tutti m'hati a pirdunari.
Si c'è qualcunu offisu stu mumentu
lu pregu di vulirimi scusari;
agguriu a tutti bon divirtimentu
na bona fini di cannalivari;
e gridati appressu a mia amici mé
a lu nostru Nannu dicemu Valé.

PASQUA DI LIBERAZIONE

Sulenni festa, squilli di campani
è santa Pasqua di libirazioni,
quannu li schiavi sutta l'egiziani
si liberaru di lu faraoni.
Mosè chi pasculava na ddi chiani
l'Eternu Diu ci vinni nvisioni:
«c'era un cespugliu mentri chi bruciava
ma lu sò lignu nun si cunsumava.»

Mosè curiusu ci misi a ncugnari
quantu pirsuaria lu sò pinseri;
senti na vuci: nun t'avvicinari!
e levati li scarpi di li peri;
lu picuraru tù nun nnì la fari,
lassa l'armali, pigghia a tò mughieri,
«torna n'Egittu, vai a libirari
tutti li schiavi chi sù prigiuneri.»

Mosè turnau n'Egittu novamenti
sempri assistutu di l'Eternu Diu,
però lu farauni priputenti
a la proposta nun cundiscinniu.
Ma dopu dieci piaghi finalmente
malvagiamenti si pirsuariu
«e cu li truppi soi, forti e putenti
fina a lu mari russu li nsiguiu.»

Prima chi farauni li jungiu
Mosè omu credenti e di curaggiu,
versu Geova arrè si rivulgiu (*salmo 83:18,19 nome di Dio*)
comu putiri aviri un salvataggiu.
Pigrau tantu chi ci rinisciu
appi l'istintu grapisi un passaggiu;
versu lu mari punta lu vastuni,
lu mari rüssu grapiu un stratuni.

Stu gran passaggiu Pasqua fù chiamatu,
Pasqua Diu lu vosi numinari,
Pasqua chi hannu sempri rispittatu
fina stiornu si pò custatari.
E Gesù Cristu quannu fù ammazzatu
sta Pasqua era vinutu a fistiggiari (*Mt. 26:18,19*)
e ora tutti quanti li nazioni
«l'hannu pi Pasqua di risurrizioni».

QUANTU TISORI PERSI

(I pacicoti lu pinzati?)

Pacecu, gran surgenti di Pueta
sà quantu ci nì foru un tempu prima,
sà quantu littirati e analfabeta
tutti maestri di metru e di rima;
di tutti, nuddu arrivau a la meta:
lu zzù Gugghiermu tuccau la cima,
«Stu gran trofeu lu lassau ccà
comu ricordu pi l'eternità».

Dutatu di na granni curtisia
di tuti si viria rispittari,
maestru di saggizza e puisia
difatti lu putemu custatari.
St'onuri datu a la sò maistria
ni lu lassau pi testimoniari
(chi stu viddanu, quasi analfabeta
classificatu fù: Primu Pueta.»

A LU CUMITATU TRINACRIA

Un gnjornu la mè musa sfacinnata
essennu priva di na cumpagnia,
dissi chiancennu: mi sentu malata,
jò sugnu nata pi la Puisia;
scappa di rintra comu na dannata,
e jò currennu appressu ci curria;
e avvilitu pi lu me strapazzu
la v'haiu a piscu o purticalazzu.

Ddà la trovavi assemi a natru pazzu;
nautru pazzu chiù pazzu ri mia
mi dissi ziu meu comè chi fazzu?
jò soffru puru di ssà malatia.
Mi misi veramenti in imbarazzu
a tanti amici mé mi rivulgia,
dicennu amici me' mi lu trovati
ndutturi pi curari sti malati?

Parsi precisamenti un gran misteru,
o fù misiricordia di Diu.
Li porti di lu celu si raperu
e Gerlando Borboni rispunniu
dicennu: amici vi sugnu sinceru
un bon cunsigghiu vi lu dugnu iu,
mi dissi un spicialista sta matina
pi ssì malati nun c'è miricina.

E iddu stessu si n'a ncarricatu
facennu simanati di firriari;
difatti organizzamu un comitatu
tririci pazzi, tutti d'attaccari;
menu mali u manicomiu è ccà allatu
ittannu un friscu ni vennu a pigghiari,
prigamu chi sta fonti è sempri viva
sutta la guida di cù la cultiva.

LU PRUFISSURI VINCENZU VITALI CHI S'ACQUISTAU TUTTA LA ME' SIMPATIA

Cu dù minuti allatu chi m'avisti
l'affettu e la stima t'acquistasti;
sappi di Cicciu, chiddu chi facisti
pi la so mostra, tù ti intririssasti;
fina a la casa ti lu ricivisti
e poi comu un frati lu trattasti;
quannu liggivi chiddu chi scrivisti
lu cori veramenti mi tuccasti.

Perciò Vincenzu nun vogghiu chi nzisti
lassami sulu a tucari ssi tasti,
pitturi comu Cicciu, nun'esisti;
cu li tò modi, stu cori rapisti
truvasti lu tò postu e t'assittasti.

QUANNU MORSI LIBORIU DIA

Comu l'ariddi satavi nall'ariu
quannu sappi chi morsi don Liboriu,
finu a Pacecu e lu sò circondariu
si ntisi l'ecu di lu sò martoriu.
Omu di cori, Pueta primariu
chi ci mancava? pagghia, fenu o oriu?
Alcamu pò calari lu sipariu:
cù canta chiui na ddù tiritoriu?